

Headline	Sindiket lombong Bitcoin tumpas		
MediaTitle	Kosmo		
Date	24 Sep 2021	Language	Malay
Circulation	155,996	Readership	467,988
Section	Negara	Page No	9
ArticleSize	419 cm ²	Journalist	Oleh MOHD. YUNUS
PR Value	RM 32,622		



Sindiket lombong Bitcoin tumpas

Oleh MOHD. YUNUS YAKKUB

SHAH ALAM – Satu sindiket melombong bitcoin yang beroperasi sejak setahun lalu tumpas dengan penahanan sembilan individu dan merampas 2,137 unit mesin bernilai RM1.28 juta pada Selasa lalu.

Rampasan bersama suspek berusia 18 hingga 27 tahun itu ditahan menerusi 30 serbuan yang dilakukan di lapan daerah di Selangor melibatkan polis dengan kerjasama Tenaga Nasional Berhad (TNB).

Ketua Polis Selangor, Datuk Arjunaidi Mohamed berkata, kejayaan itu merupakan hasil risikan pihaknya sejak Jun lalu.

Kesemua suspek yang diberkas berperanan sebagai juruteknik mesin bagi premis-premis bitcoin di bawah kawalan mereka.

Menurut beliau, siasatan mendapati sindiket tersebut yang beroperasi sejak September 2020 telah menyebabkan TNB mengalami kerugian RM24.36 juta.

"Satu unit mesin bitcoin bernilai RM600 dan berdasarkan kiraan kasar TNB mengalami kerugian RM1,167 sebulan bagi setiap mesin dan RM70,000 pula bagi sebuah premis.



ARJUNAIDI (dua dari kiri) menunjukkan mesin melombong bitcoin yang dirampas dalam operasi besar-besaran pada sidang akhbar di Shah Alam semalam.

"Selain mesin melombong matawang kripto itu, kita turut merampas 10 unit komputer riba, lima set komputer, enam unit grafik kad *mining ethereum* dengan setiap satu unit mencecah RM20,000," katanya pada sidang akhbar yang turut dihadiri Ketua Jurutera SEAL TNB, Megat Nasaruddin Megat Mazelan di sini semalam.

Arjunaidi memberitahu, secara keseluruhannya nilai mesin yang dirampas dan penggunaan elektrik yang telah dicuri mencecah RM25.64 juta.

Ini merupakan kejayaan terbesar membabitkan serbuan aktiviti bitcoin pada tahun ini.

Tambah beliau, siasatan lanjut sedang dijalankan bagi mengenal pasti dalang sindiket yang melakukan aktiviti tersebut dalam skala besar.

Kesemua suspek direman dua hingga empat hari bagi membantu siasatan dan kes disiasat mengikut Seksyen 379/427 Kanun Keseksaan.

Siasatan turut dijalankan mengikut Seksyen 37(1) Akta Bekalan Elektrik 1990 yang memperuntukkan denda tidak melebihi RM1 juta atau penjara sehingga setahun atau keduanya.